

513

131

DE PACE
ORATIO
GRATULATORIA,
HABITA UNIVERSITATIS NOMINE,
in Majoribus SORBONÆ SCHOLIS,

Die Jovis 27^a mensis Februarii, an. Dom. 1749.

A CAROLO LE BEAU, Rhetorices in GRASSINÆO
Professore,

*Et in Regiâ Inscriptionum & Litterarum Academiâ Socio,
Universitatis jussu edita.*



PARISIIS,
Apud THIBOUST, REGIS, nec-non Academiae Parisiensis
Typographum, in Plateâ Cameracensi.

M. DCCXLIX.

UNIVERSITY

OF THE STATE OF NEW YORK

IN SENATE

January 10, 1881

REPORT

OF THE

COMMISSIONERS OF THE LAND OFFICE

IN RESPONSE TO A RESOLUTION

PASSED BY THE SENATE



ALBANY:

JOHN B. LEECH, PRINTING OFFICE, 1881.

Entered as Second-Class Matter, July 1, 1879.

Postage paid at Albany, N. Y.



DE PACE

ORATIO

GRATULATORIA.



UM in rebus feliciter Bello gerendis mirificè exultet animus, & acerrimâ voluptate effervescat ; tum postquam egregiis laboribus defuncti confedimus, habet illa quies quamdam dulcedinem, quæ semper immixtam vel maximis præliorum laudibus acerbiterat mitigat, affertque suam bellicis gaudiis maturitatem : ILLUSTRISSE SENATUS PRINCEPS, ILLUSTRISSIMI PRÆSIDES, INTEGERRIMI SENATORES, VIRI OMNIUM ORDINUM SPECTATISSIMI. Inest enim in Victoriæ lætitiâ asperum quiddam & turbulentum : obstre-punt vincientium cantibus dissoni lugentium clamores ; & in clarissimo quolibet triumpho spirat aliquid è pompâ funebri ;

cùm in illo magnifico apparatu non eorum modò gloria, qui vicerunt, sed eorum etiam, qui victi ceciderunt, exsequiæ duci videantur. At verò in PACE, quæ res bene gestas sequitur, pura & sincera nitet hilaritas, nullâ erga alios miseratione, nullâ de nobis in posterum sollicitudine perturbata; præteritas victorias securi respectamus, quæ non jam nimîâ propinquitate perstringunt oculos, sed amœniùs rident in bono lumine collocatæ: nemini lacrimas gaudia nostra eliciunt; nemo cantibus nostris ingemiscit: crescit nostra felicitas alienæ conspectu felicitatis.

In suavissimum hunc rerum statum REGIS nostri prudentiâ, fortitudine, justitiâ adducti, quam apud ceteras Europæ Nationes ex restitutâ quiete delectationem undique diffusam circumspicimus, eandem ipsi quoque jucundissimè experimur, lætamurque nostras tandem victorias, jam extra fortunæ aleam in PACIS gremio depositas, tantâ claritudine terminari. Neque profectò cuiquam PAX venit optatior, quàm vobis, ILLUSTRISSIMI CURIÆ PROCERES, qui pretiosissimam Regiæ administrationis partem ab ipso REGE vobis attributam sortiti, PACEM maximè exornatis; domesticum ac civile bellum, quo concurrunt inter se atque configunt humanæ cupiditates, ingenio, integritate, constantiâ coercetis, sanctissima tuendo jura æquitatis; quæ si mortales inter pro suâ dignitate dominaretur, jaceret bellorum furor, perpetuâ animorum concordia sepultus.

Tantam commissi vobis muneris amplitudinem venerata semper ACADEMIA PARISIENSIS, vos ab omni memoriâ temporum sibi tutores ac patronos amplexa est: vestrum in pectus conspirantes vobiscum animi sui sensus effundere sibi dulce & decorum existimat. Illa PACIS Artium in Galliâ atque adeò in totâ ferè Europâ genitrix, dum creditam sibi

juventutem ad tutandam quoque Patriam accingit, tenerisque mentibus injicit spiritus verè Gallicos, ipsam tamen præcipuè convertere studet ad cultum placidæ humanitatis.

His ego nunc auspicijs **P A C E M** laudare aggredior: magnares, & quæ vocem desideret meâ voce grandior, nisi recepta penitus pectoribus vestris ipsa **PAX** adjuvaret Orationem meam, sua vobis & decora & commoda ostentando. Quæ licet regiones novas non venditet pro dote ad nos allatas, affert tamen & gloriam & utilitatem omni munere majorem. Eam igitur ostendere mihi propositum est ita gloriosam, ut vel sine utilitate prædicanda sit; ita utilem, ut vel sine illis gloriæ insignibus fuerit expetenda. Quæ duo dum breviter persequor, favete, quæso, **AUDITORES**; & ad **REGIS** vestri laudes, quibus Gallorum aures suaviùs etiam quàm suis deliniuntur, animos vestros excitate.





P A R S P R I O R.

ILLUD est summæ potestatis splendidissimum jus & cum ipsâ conjunctissimum, ut immenso quidem infra Deum intervallo constituti Reges, Deo tamen inter ceteros mortales proximi, quemadmodum ille dat signum ventis, emittit tempestates, effusasque revocat & comprimit, ita belli pacisque vices arbitrio nutuque moderentur. Sedentes in otio Populos ad arma excitare, eorundem frenare impetum; commovere fuorum manus, commotas ab ictu cohibere; accendere fulmina, quibus quassatæ corruunt Urbes Regnaque contremiscunt, eadem restinguere, ipsorum est. Bella quidem non gerunt soli; sed bella soli decernunt, soli componunt PACEM: ut igitur, utrûm arma justè capiantur, totum eorum Famæ periculum est; sic ad eos præcipuo jure pertinet ea laus, quæ ducitur ex splendore magnificæ PACIS.

Ejus verò laudis an omnino nulla pars pervenit in Populos? An præclarâ in PACE habent quidem multa quæis fruantur, quo glorientur nihil habent? Imò præter eam gloriæ lucem quæ ex REGIS sui claritate in ipsos refunditur, id etiam habent proprium ac suum, quodd non REGIS solum consiliis, sed suâ quoque operâ effectum sit, ut legibus honestis bellum componeretur. In REGIS sapientiâ positum est, ut velit, in Populorum manu, ut possit incolumi dignitate recondere gladios; cùm nulla sit satis decora PAX, quæ turpe bellum consequatur.

Sed honestam PACEM, quam tandem esse dixerim? Eamne quâ jugum imponitur grave acerbumque victis, quâ Impe-

rii limites ultra juris terminos proferuntur, quâ per fœderum fideique humanæ ac jurisjurandi sanctitatem injuriæ conferantur? Quid in illâ PACE veri decoris, quæ tota ex injustitiâ effulget? Eam ego PACEM honorificam vocaverim, quæ non coacta & expressa damnis, sed triumphis quæsitâ, in ipso progressu lætarum rerum inter lauros enata, nihil cupiditati, omnia justitiæ tribuit; concussaque vi diffidorum legitima jura stabiliendo, sic etiam delet memoriam discordiarum, sic æquatis cuncta librat ponderibus, ut propè, utri vicerint, si annales fileant, in incerto relinquatur. Ex hac imagine, quis non agnoverit eam, quâ nunc lætatur, PACEM; gloriosam LUDOVICO, cujus moderationem declarat; gloriosam Gallis, quorum fortitudinis præmiûm est.

Quantâ moderatione fortunæ suæ vim reprefferit Bellator non suî minùs quàm rerum potens, testatur ipsum fœdus, dum de LUDOVICI commodis filet, dum nullam ipsi mercedem relinquit laborum, præter pulcherrimam defensorum sociorum ac servatæ dignitatis suæ conscientiam. Hæc autem abstinentia utrûm voluntaria sit, utrûm magna, utrûm etiam Victoriarum laude præclarior, interroga Victorias ipsas, interroga tot captas Urbes, tot Arces expugnatas. Quid optare LUDOVICO, quid postulare, quid sibi depacisci liceret, clamabunt ipsa rudera everforum munimentorum, clamabunt campi præliorum commemoratione insignes. Ad illustrandam LUDOVICI temperantiam quænam vox vehementior audiatur? Et affero tamen testimonium aliquanto gravius, nec recusandum vobis, ô Gentes nunc recenti fœderum vinculo nobiscum iterum conjunctæ: vos, vos inquam, testes appello: vos in æstu diffidorum, flagrantibus tum maximè odiis, gravissimam REGIS nostri moderationi commendationem addidistis: vos quàm incredibile esset LUDOVICUM

Victorem posse continere sese à cupiditate amplificandi Imperii & dictis & scriptis non semel declarastis. Futurum igitur LUDOVICI præconium jam antè inscientes adornabatis : hæc enim omnia quanto tunc infestius jactabantur , nunc cùm vana ex rerum exitu deprehensa sint , tanto modestum Victoris animum prædicant vehementius.

Obstrepebat confusus tot passim vociferationum & querularum sonus sanctissimis LUDOVICI vocibus , qui ex quo primùm justis ad arma causis compulsus est , non destitit offerre pacem eâdem dexterâ , quâ proriebat urbes exercitusque sternebat. Pacem ab ipsis belli primordiis totâ mente intuitus , nunquam ab eâ deiecit oculos : PACEM per cædes , quibus ingemebat , per murorum ruinas , quas calcabat invitus , persequabatur : non Provincias , non Urbes , PACEM unam quærebat armis ; neque aliam ob causam tam inquieto bello fatigabat hostes , nisi ut secura tandem , Europa , quiesceres. Ecquæ Victoria fuit tam illustis , cujus captus illecebris non ex medio ejus amplexu respectaverit PACEM , PACEM vocaverit ? Talis in Fontenæi , in Laufeldi cruentis câmpis , adhuc atrocissimo prælio calens , qualis antea Versaliis fuerat , qualis postea ejus animus per Legatos suos Aquisgrani fuit , non suo , non suorum periculo exasperatus , nullâ prosperitate tumens , ideo non altior quia per se magnus est , hanc unam ab iis quos superaverat exigit victoriæ mercedem , ut iniri de PACE colloquia patiantur.

Sed venia fortassè danda hostibus fuit , quòd tam insolitam animi continentiam ut sperarent adduci minimè poterant ; cùm in rapido cursu prosperarum rerum augetur quotidie potestas non standi promissis ; & una quælibet æstas , imò una ferè quælibet dies LUDOVICI armis adjiceret aliquid retinendum cupiditati , moderationi relinquendum. Quan-

quam tamen singularum victoriarum mansuetudo vel hostibus fidem facere debuit, quid æquitatis foret ex universo bello expectandum. Quantâ lenitate se gessit LUDOVICUS erga expugnatas Urbes, cum hostium ferme non minùs quàm suorum sanguini parceret, cum deditum sese non salutis solum sed honori consuleret, cum & suorum & captorum labores pariter levare conaretur, cum illo vultu non victoriâ incenso sed pacato & amico ingrederetur, certante circa eum civium nuper subditorum studio & cum Gallis militibus, utri REGEM impensius colerent, & cum ipso REGE, utri victoriâ magis gauderent! Hostes verò vulneratos, trepidâ suorum fugâ desertos, quantâ curâ tolli jubebat eum suis, spiritumque, qui in medio gloriæ sibi eripiendæ conatu propè defecerat, revocari. Omne Gallos inter & Hostes discrimen clemens victoria sustulerat; permixtique in Nosophomiiis victi cum victoribus alimenta, remedia, curas nobiscum unâ partiebantur: non Gallos esse se, tantum in prælio fenserant. At quos armorum fors captivos LUDOVICO tradiderat, non inclusi carceribus, non inopiâ rerum & regionum squalore macerati, sub REGIS tutelâ inviolati, procul à belli malis felici Galliæ cælo fruebantur; in fortunæ nostræ partem veniebant; explebat apud eos Patriæ desiderium hospitum comitas; totamque Galliam in medio Europæ sinu positam mirabantur, quasi templum quoddam humanitatis ac lenitatis.

Hoc bellum, cujus nulla pars non aliquâ mansuetudinis notâ insignita est, nisi PACE moderatâ finitum esset, nonne à se ipse LUDOVICUS descivisse videretur? Habet tamen belli præmiorum contemtor animus præmium omnium amplissimum, atque ejusmodi, ut iis cumulatissimum obveniat, qui cetera abjiciunt. Est enim hoc inter mortales naturali quo-

dam pacto constitutum ; ut præclarè factis quanto contingit emolumenti minus, tanto plus gloriæ addatur. Obligatum se putat ei viro humanum genus, qui gratuitò res egregias fecit: uno consensu Nationes omnes, omnia secula mercedem illi exsolvunt laudis ac prædicationis, fenore sempiterno. Non protulit Regni sui valentissimi limites **LUDOVICUS**; sed amplificavit illud, quod omni Regno latius patet, quod eminet etiam in posteritatem, Imperium, quo regnatur in animis: propagavit firmisque defixit fundamentis reverentiam apud Exteros, auctoritatem apud Socios, fidem apud omnes famamque virtutis. Hæredem se non degenerem præbuit optimi Gallorum **REGIS**, cujus ex ore sacro quondam editum est, & ad omnium Regum aures personuit præconium ingens, *fidem si è mortaliu catu ejiceretur, in ore Regum residere oportere*. Hoc tam bono Rege quamvis felicior **LUDOVICUS**, non minùs tamen verax & fidelis, quod integro bello professus erat, id Victor confecto præstitit; atque ex defensis Sociis ac vindicato Regni sui decore id unum est consecutus, ut cùm cum omnibus gentibus admirabilem bellum fecisset, iisdem quoque carissimum **PAX** efficeret. Quantum ad labores Gallorum nobiles illos ac felices ex tam modestâ **PACE** refulget laudis! Huic etiam **PACIS** moderationi eximia Gallicæ virtutis facinora, quæ priùs eam incredibilem faciebant, quantum luminis pretiique adjecerunt!

Et dignus profectò fuit pulcher bellorum finis, qui maximis fortitudinis humanæ conatibus peteretur. O quæ nunc benignâ manu mederis vulneribus, **AMICA PAX**, quæ deformatam priùs miserabili strage tot agrorum faciem tutis jam messibus operire meditaris, quæ dejectas urbes ac penè sepultas cineribus excitas è ruinis, per te mihi liceat respicere velut è portu præteritas oppugnationum præliorumque tempestates,

pestates ; quibus jactata aliquandiu & fermè demersa videbaris , ut nitidior nunc clariorque emergeres. Quòcumque circumfero oculos , impressa omnia video vestigiis laudum : *Scaldis* , *Mosam* , *Rhenum* , multis jampridem certaminibus nobilitata flumina , & bellicum quiddam sonantia ; superba priùs validissimis , quas præterluendo muniebant , arcibus ; nunc inter confitas LUDOVICI palmis ripas decurrentia : facile perruptas oppidorum moles , Imperio nostro velut aggeres & claustra oppositas , quæ nunc quanquam Finitimis restitutæ , non tam eorum terras suis propugnaculis , quàm fines nostros Gallici nominis terrore tutantur & memoriâ celerissimæ expugnationis.

Nam contrà quàm apud Orientis Populos in more positum est , ut finitima inter se potentissima Imperia immani desertarum terrarum latitudine distherentur , & pro certissimo finium suorum præsidio sibi circumdant squalorem , solitudinem , vastitatem ; Gallis quidem , genti ad humanitatem natæ , jucundissimum est Imperii sui ubertatem vicinorum ubertate continuari ; ridere omnia , circa se gaudent ; circumspicere amant apud Finitimos florentes urbes , segetes lætissimas ; sed ipsis tamen nullum tutius terminorum munimentum est , quàm earum ipsarum Urbium mœnibus inscripta diu vis armorum suorum ; inter uberrimas segetes signata campis suarum pugnarum nomina ; & prolata longiùs in Finitimorum terras vestigia victoriarum , quæ irrumpendi cupidis Galliæ aditum faciunt latè horribilem. Sua Gallis tropæa pro vallo ac sepimento sunt.

Quantam opponet formidinem exterorum animis ipse campi *Fontenai* conspectus , ubi diram illam aciem , horrentem tellis , sætam ignibus , longo tractu undique minitantem , oblinita Virtus multo nisu multoque anhelitu tandem disjecit !

Eos audire mihi videor notata locis singula facinora com-
monstrantes : huc sese primum incussit pertinaciâ nostrorum
efferrata Gallorum vis : heu ! quanta in incurso, in conflictu,
in ipso obtutu atrocitas ! Hic lætissimi equites, invicta bellis
omnibus manus, illic fortissimi pedites, adversi adversis co-
hærentes ac mutuò propellentes, infixis utrinque hastis,
gladiis, alternâ impressione ac motu corporum Victoriâ
aliquandiu quasi librârunt, tandemque rapuerunt. At illo
loco, inquit, stabat impavidus intra vulnorum periculum
LUDOVICUS, totam in consilio, in ipsâ fronte fortu-
nam gerens ; cujus oculorum conjectu velut ancipiti fidere
accensi furebant suorum animi, nostrorum mentes percussæ
pavebant. Aderat DELPHINUS, jam paternæ magnanimi-
tatis hæres, qui juvenili audaciâ fervens, leoni nuper adulto
similis, in vulnere, in flammâ totâ cupiditatis vehementiâ
ruens, vix Patris imperio continebatur. Volitabat per ordines
ægro corpore, animo valentissimo ille Dux, addictus aprus-
que ingentibus LUDOVICI fatiis, strenuus manu, consilio
vigens, omnium belli artium gnarus ; victoriæ contemtor,
ubi cunctandum est ; eandem, ubi dimicandum, certò secum
trahens ; in tumultu pugnarum tum maximè pacatus & suū
compos ; cujus tum maximè celerior quàm fulgur contuitus
oculorum est, major impetus quàm fulminis. Hos diu gemitus
Vicinis nostris locus ipse eliciet.

Ex aliâ parte admonebunt animosæ Gallorum fortitudinis
Raucusii saltus. Illic inter sepes omni pernicie instructas mor-
temque ignitis mille faucibus evomentes, singulis ferè passi-
bus singula munimenta perruperunt ; hostibusque citra Mosam
nimis confidenter cessantibus cunctationem luctuosam reddi-
derunt.

Terrebit, & cruentam recordationem objiciet *Laufeldensis*

pagi facies novissimumque certamen, in quo superanda fuerunt propè omnia pericula bellorum; perfringendæ munitiones, aperienda sibi via, claudenda hostibus, qui patente aditu pro mortuis vivos, pro faucibus integros, hydræ similes, perpetuò sufficiebant; vincendus alius æquo campo stans exercitus: perfregerunt, aperuerunt, clauferunt, evicerunt: unus pro multis quisque miles & ad singulas hostium sibi succedentium vices repetito conatu ipse sese renovans, perfusi & suo & hostili cruore, id agebant unum, ut præsentī LUDOVICO, suosque animos suorum animis addenti, vel audaciam suam, vel mortem approbarent. Ergò ignotum antea triumphalibus Galliæ fastis Laufeldi nomen, effecerunt, ut esset in posterum formidandum hostibus; Gallis ornamentum ingens & incitamentum virtutis. Hæc, ô Galli Duces, ô Milites, in Finitimorum campis monumenta defixistis, in longas ætates duratura.

Ecce attollit sese oculis aliud monumenti genus, nec minùs decorum Gallis, expugnata Civitates, quarum pleræque captæ sunt ipso oppugnationis nuntio celerius; pauca tandiu solum videntur obstitisse, dum divagatus per Europam rumor, conversis in eam partem omnium oculis, spectaculum cohonestaret. Hic multitudine rerum obrui me sentio: confertim offerunt sese cogitanti *Gandavum*, *Brugæ*, *Aldenarda*, *Teneramunda*, *Neoportus*. Eodem anno *Lovanium* capitur, *Antuerpia* portas aperit, *Montes* & *Caroloregium* terribilem arcibus CONTII manum non sustinent, cadit *Gissenopolis*; & quæ singulæ quondam vel universum totius ætatis bellum memorabile faciebant, nunc vix paucorum aliquot dierum decus faciunt universæ.

Tornacum non tutantur firmissimi aggeres, arces munitissimæ, non exercitus ad illidendas muris obsidentium copias

raptim ab acerrimo Principe concitatus. Fregit urbis propugnacula vis eadem, quæ Fontenæum cuneum perfregerat; rotaque & operum & auxiliorum moles pariter disiecta & dissipata ad id unum evasit, ut expugnationem duplici clade insigniret. *Ostendæ* neque in suis munimentis, quæ universas olim Hispaniæ vires toto triennio in obsidionem incumbentes repulerant, neque in optimo portu, quo succincta est, neque in mari, quod propè tunc consentiebat conspirabatque cum hostibus, ullum præsidium fuit. Atque ut non humanæ solum opes, sed ipsa natura tempestatesque vincantur, à *Bruxellis* non asperitas hyemis, non convectandi labor MAURITIUM Gallosque deterrent: sæviente Februario, inspectante qui ad urbem liberandam concurrabat exercitu, expugnatur; simulque alter intra mœnia exercitus, oetodecim peditum, novem equitum cohortes, septemdecim primi ordinis Duces, quot fortè nunquam diuturno quolibet bello capti fuere, cum unâ civitate capiuntur.

Crescit progressu vincendi difficultas. *Namurcum*, quam urbem! ipso nomine & laboriosæ quondam obsidionis famâ adhuc reformidatam, vallatam rupibus, castellis & gemino flumine cinctam, aditu penè invio; hanc arcem unicam Austriacis quæ Mosam inter & Mare superesset, victoriarum nostrarum lateri imminentem, collectis viribus protegebant hostes, opportunisque castris ac vel ipso situ defensis tuebantur. Quis, ut hærentes excutiat ac revellat, quamlibet multo sanguine non paciscatur? Eos tamen Dux idem, qui non semel aut eluserat aut vicerat, sine ullo certamine, solo motu & comminatione armorum, solerti circuitu & scitè dimensis itinerum intervallis ac conversionibus, commeatu intercluso obfessos ipsos & è stativis detractos trans Mosam compellit; ac civitatem externo præsidio nudatam, adhuc tamen suo

ferocem , Princeps Magni Condæi memor , oppugnationum celeritate & peritiâ intra sex dies ad deditionem adigit.

Vos-ne , ô Batavi , Gallorum quoque virtutem , quæ præstò quondam fuerat stabiliendæ vestræ libertati , infestam experiri maluisse ! In *Bergæ* ad *Somam* paludibus , quæ vim omnem ab Urbis plûs quàm tertiâ parte arcebant , in absolutissimi operis munitionibus , in immenso & perplexo tractu tot cuniculorum , ubi undique circum Urbem adeuntibus insidiabatur occulta mors , in exercitu , qui libero comœatu quotidiana militum vestrorum damna refarciebat , frustra vos confisos esse sensistis. In eventum tam præcipitis Gallorum audaciæ suspensa expectatione Gallia , erecta omnis Europa ; secura propè ob fiduciam Batavia : Bergenfibus , ad manum annona affluens , instructissimum armamentarium , parata in portis auxilia , alter exercitus obsidentium tergo imminens , Batavia omnis in subsidiis aderat : sua virtus Gallis & LOWENDALUS.

Captâ Civitate , & post bimestrem obsidiônem , cùm tamen irruptionem nondum maturam munimentorum invictum robur repudiaret , aperto Marte expugnata ; eâ Civitate , quæ Batavorum spiritus omnes in propugnaculis suis tanquam in arce tutissimâ collocatos habuerat , quam nec capi posse crediderant , vix ex ipso demum eventu captam crediderunt , stupente Bataviâ , trementibus ad tantæ ruinæ sonitum ceteris ejus Provinciis , ecce *Trajectum* ad *Mosam* contracti hostiles exercitus hanc novissimam spem fovebant. Dicant periti artium militarium , quâ solertiâ MAURITIUS unus tot Ducum prudentiam ludificatus fuerit ; quo consilio egregius bellicarum simulationum artifex eos ab Urbis , cui tuendæ totis viribus incubabant , custodiâ deduxerit. Enarrent illud iter consignandum bellicis annalibus & posteris documento futurum , quo distractis hostium copiis , ipse turbinis ritu repentè ingruens , famam

adventûs sui, circumcluso undique Urbis aditu, præcucurrerit. O quanto plus unâ Urbe, quàm omnibus antea ceteris partum fuit ! Ex singulis Oppidis singuli tantùm triumphi referebantur : hîc omnium triumphorum fructus , exoptata illa **P A X**, tandiu quæsitâ, tandiu fugitans, quæ instantem ubique **LUDOVICI** manum hæctenus fefellerat, vestigata tandem, deprehensa, expugnata est. Quæ quantum & ex moderatione **LUDOVICI** & ex fortitudine Gallorum gloriæ acceperit postquam expositum est, nunc quid secum afferat utilitatis expendemus.





P A R S A L T E R A.

QUAMVIS inter diffidia Rerum publicarum, quæ, disceptante Providentiâ, exercituum manu decernuntur, iudicium ferri existimetur secundum Victorem, eum tamen ego Principem non modestum solum, sed sapientem arbitror, qui pronuntiatam à Victoriâ sententiam summo jure non exsequitur, & in componendâ PACE, ex alto fortunæ suæ fastigio ultro se demittens, ita cum aliorum rebus committitur res suas, ut ad quamplurimos PACIS utilitas diffundatur. Ecquis enim fœdus illud PACIS satis fidum certumque crediderit, quod defatigatione & necessitate expressum est? Conticescit quidem sonitus armorum, sed residet in animis dolor, simulas, bellum ipsum; neque diutius concordia vigeret, quàm dum eam aut spes aut desperatio abruperit. Illa demum firma PAX atque stabilis est, illa ipsis hæret inscripta sensibus, quam non victoribus solum, non solum sociis, sed victis etiam expedit firmam esse ac stabilem; in quâ victoriarum gloria quidem ad unum, fructus pertinet ad universos. Tale præ se fert ingenium ea PAX, quam & novis & veteribus amicis & nobis ipsi gratulamur: hæc citra invidiam est; hæc tam sine vi, tam sine superbiâ offert sese & occurrit, ut ab omnibus qui inter se bellârunt, data pariter, pariter accepta esse videatur. Prodest Europæ, quam sublevar; sociis nostris, quorum jura aut restituit aut confirmat; Gallis, quos cumulatura est omni bonorum ubertate.

Prima quidem PACIS aura quàm suavis ad omnes acciderit, argumento est expedita celeritas, quâ Legati bellantium popu-

lorum, totius Europæ sensus ingenti pectore gerentes, moras omnes, quæ adventanti PACI obstare possent, sedulò removerunt. Et verò tantam, tam vehementem rerum jactationem, cum potentissimæ Nationes horrendo inter se concursu colliderentur, nulla gens in Europâ fuerat, quæ non, licet quieta, sentiret; sed quàm paucæ quieverant! Aliæ PACIS retinentes; precibus, consiliis, machinationibus, interdum etiam minis, omnibus denique stimulis ad arma impellebantur; ibi sollicitudines, suspiciones, rixæ, domesticæ dissensiones: alia ditionis angustæ terminis circumscriptæ magnorum exercituum incesso proterebantur; ibi vastitas, ac vel sine bello omnia incommoda bellorum: alia irretitæ fœderibus, sedibus suis excitæ, fortunam non suam sequi cogeantur, trahebanturque quasi cladium alienarum appendices; ibi mœror, luctus ac derelictio agrorum: alia præcipuo adversus Gallos bellandi studio inflammata, quæcumque mala in ceteras dispersita procreabant, hæc ipsæ omnia patiebantur; & quo majore mole concurrebant, eo patebant latiùs omni generi calamitatum. Atque ut in immani & latè dissipato incendio alii hauriuntur flammis, alios opem ferentes ipse vapor afflatus enecat, alii aut superincidente ruinâ opprimuntur aut dirutos lugent penates suos, alios pavor deturbat in præceps; suum quemque fatum variâ peste conficit: sic omnes ferè Europæ gentes in communi deflagratione diverso genere malorum confictebantur.

Conversa erat in pugna campum maximarum regionum facies. Quò non pervolavit belli furor! Trajiciebat latissimos amnes; montes altissimos transliebat; ardebat inter nives ac pruinas, sublato discrimine temporum; sæviebat in mari inter procillas, ipsis procellis tetriùs; & quas insulas in ignotis diu terrarum angulis Natura sibi quondam seposuisse visa est, ubi
 integra

integra & pacata resideret, quamvis tam procul semotæ, eodem quo nos fragore quatiebantur.

Quænam est opaca illa nubes ex iis Partibus veniens, unde Aquilones erumpunt & tempestates? Jam Poloniæ campos operit, jam Germaniæ incubuit, & versus Rhenum minans provolvitur. Interea auditur vox PACIS: *Russi* consistunt; respectant confectas nequicquam immensas vias, iterque convertunt; felices, quòd novum LUDOVICI triumphis titulum non adjecterint! Felix quoque, qui vel hostibus suis indulgere cupit, LUDOVICUS, quòd in vastas Septentrionis plagas non gemitus, vulnera, orbitatem cladiumque reliquias, sed intactos artus, neque ullo malo præterquàm itineris labore fractos, remittere sibi licuerit! Redeant in sylvas paludesque gelu obductas integri, incruenti: illic artes à Gallis ad se perlatas excolere potiùs libeat, quàm hîc eorundem manum experiri.

O quanto felicior motus, quo tota nunc Europa fervet, quàm quo priùs concussâ est! Quæcumque bello conturbata, divulgata, distracta fuerant, jam naturæ suæ redditæ suam in sedem ultro revertuntur. Agnoscunt filios parentes, urbes incolæ ac leges suas, rura agricolæ sibi restitutos. Hæc verò omnium felicitas LUDOVICI animum quàm leniter permulcet, qui, quod optimorum Regum est, non suis solùm sed & humano generi natum se putat; Regesque ideo præsertim supra reliquorum mortalium capita elatos, ut eorum beneficia ex alto possint ad plures derivari!

Sed tametsi ad omnes permanat homines in bono Rege benefaciendi voluntas; quo tamen interiore circa eum orbe contrahit illa se atque concludit, eo præsentior, ut Solis, vis ipsius est, intenditque sese ex propinquo vehementiùs; ac sociorum commoda propriis sic adjungit & immiscet, ut apud æquitatis amantes pari utraque gradu collocata, apud ma-

gnanimos viros aliena suis potiora etiam habeantur.

Hâc præditus animi magnitudine LUDOVICUS præcipua sibi rerum secundarum præmia posuerat in ejus Gentis utilitatibus, quæ Gallia quondam æmula, quos tunc animos adversus Gallos sæpe exercuit, nunc meliore fato confocians cum Gallorum animis, consanguinitatis vinculo copulata nobiscum est, nec minùs etiam communione periculorum & gloriæ. Conspexerunt Alpium faxa Legiones Hispanas, præeunte fortissimo Principe, quidquid in eâ belli parte arduum & formidolosum fuit, quidquid hauriendum laboris, sanguinis effundendum, ad omnia promptas & paratas. Fruere jam & Tuis & Tuorum laudibus, PHILIPPE; his tam faustis, tam præclaris omnibus ingredi matrem ditionem cum augustissimâ Coniuge, quæ quo die Tecum splendidissimo conubio juncta est, cum plurimis virtutibus dotalem Tibi Parentis sui gloriam, & ad ea, quæ jam per Te habebas, addita insuper nova ad sperandam ubique victoriam jura secum attulit.

Et jam tibi quidem debemus, ô fortunata PAX, munus hoc tua inter prima munera profectò jucundissimum, quòd longo post intervallo desideratissimæ LUDOVICI Filiæ frui conspectu, & nostris infixis mentibus neque novem annorum spatium oblitterata virtutum suavissimarum lineamenta recognoscere nobis contigerit. Fuit, fuit illud Gallis spectaculum omni triumpho lætius, cum in optatissimæ Familiæ toto amoris studio obviàm provolantis amplexus ipsa sese effunderet. Vidimus occursum illum tenerrimæ utrinque caritatis: & Parentum, & Fratris, & Sororum lacrymas gaudio manantes vidimus; quas & oculis & intimo pectore hauriens Gallia, quæ REGUM suorum affectus totis medullis combibere solet, reddebat ipsa lacrymas dulcissimâ pietate imbutas. Te, LUDOVICE,

inviſtum Bellatorem ceteræ Nationes contemplantur: nos præcipuè juvât Optimum Te Parentem, quo nomine nos maximè contingis, quo propè nos cariffimæ Soboli exæquamur, intuituri.

Neque circa nos ſolùm exoriuntur lætiſſimi PACIS fructus, ſed quàm longè protenditur Gallorum ſocietas, eò ſalus, proſperitas ac noſtra proinde gaudia propagantur. Reſpirent tandem à laboribus & honorificum ſudorem abſtergant *Boruffi* milites, qui REGIS fui conſilio ducti, fortibus factis incitati, quòcumque jus vocabat, arma rapidè circumferentes, novi quidem Regni, ſed robuſti jam & in ipſo ferè ortu vigentis, incunabula palmis contexerunt. REX verò aſtrictâ ſibi firmiùs fœderis huiusce nodis *Sileſiâ*, & belli pariter & PACIS artibus excellens, Imperii, primùm armis, mox legibus & ſapientiſſimis inſtitutis, confirmati bis conditor, liberales Diſciplinas & bene cohærentem cum iis Gallorum amorem retineat; nobis eò carus magis, quòd quanquam terrarum intervallo diſtans, Gallis tamen eſt LUDOVICI & amicitia & virtutum ſimilitudine proximus.

O Reſpublica, quondam præpollens ac toto latè interno mari imperans, quæ nunc anguſtioribus coarctata limitibus, ſuperbas tamen priſtinæ potentiæ dignitatique reliquias magnificè tueris, huic quidem PACI redditum tibi patrimonium & quietem debes, ſed Galliæ debes PACEM ipſam, ſalutem, libertatem. Quàm pulchrâ, quàm ſerenâ luce nitebit in poſteritatem, qui turbulentiffimis tempeſtatibus infeſtus fuit ille dies, quo deſperatione & furore concitata libertas, exſanguem Patriam ex hoſtium faucibus eripuit, eoſque in ejus viſceribus hærentes, in ejus ſanguine ſuperbè exſultantes, verſo in rabiem extremo ſpiritu, detraxit! Illo, illo die documentum editum eſt, quàm ſint acres & exitioſi morſus

prostratæ & proculcatæ libertatis. Hæc Genuensibus dux, hæc signifer, hæc telum fuit. Non ferunt catervæ armatorum imbellem multitudinem, cui, sublati vivendi causis, vita ipsa vilis est: pars rapinis suis incubantes cæduntur; pars magnâ strage ex Urbis possessione excussi, in vicina montium juga frementes freudentesque compelluntur.

Ingenuerat Genuensium malis Europa omnis; eorumdem audaciam admirata obstupuit: Galli quorum in gemitu imperus, in admiratione alacritas est, cum Hispanis ad auxilium ruunt. Frustrâ pervolitant hostium classes; frustrâ intercludere maria subsidii parant. Vix unquam, tranquillâ PACE, tot è Galliâ naves ad comparandas Genuensium opes procurrerant; quot infestis ubique & undis & littoribus ad capeffenda apud ipsos pericula provolârunt.

Et sanè longè pretiosior quibuslibet divitiis merces à Gallis perebatur; aut Sociis salus, aut sibi honesta mors. Quoties angusto campo, montibus circumsepto, quasi in Amphitheatro quodam, horribili utrinque contentione concursus est; cum illi dolore & pudore incensi, auctis & viribus & animis, extortam sibi prædam sæpius repeterent; hi & BUFFLERUM qui, eos ut eriperet, ingentem animam profudit, & RICHELIIUM qui caput objectando eripuit, confidenter secuti, cum hostibus de salute, cum Sociis de virtute certarent! Quænam dies, quænam nox suo periculo, suâ laude caruit? Quænam ex tot circumfusus cacuminibus rupes non arx quædam liberatis fuit, aliquo memorabili prælio famam consecuta? Nunc igitur beneficio PACIS diuturnâ obsidione liberati, efficacem & strenuam LUDOVICI miserationem experti, omnibus quæ bellum abstulerat recuperatis, dubitandum relinquent posteris, utrùm sic premi calamitosius fuerit, an sic defendi & sibi & Sociis gloriosius.

Quæ verò PAX amicis nostris ita fecundam se præbet ac fructuosam, an illa tandem nobis, quorum operâ præferrim exulta, quorum sudore ac sanguine irrigata est, nihil affert frugis nisi gloriam ac dulcedinem aliis commodandi? Nihil prorsus, AUDITORES; præter unum tamen, quod ipsum non arcessitum, non postulatum, non expressum est, sed ex ipsius naturâ PACIS aptum atque connexum; quo vel uno cetera Gallorum omnia bona continentur: totum nobis LUDOVICUM restituit; cujus in capite, providentiâ, bonitate Gallis securitas omnis, ubertas, felicitasque reposita est.

Nostræ securitati, incolumi REGE, quid intervenire perturbationis potest? Te quidem, LUDOVICE, ad exercitus euntem, bellicosque labores fortiter tolerantem mirabamur: quantum animorum, alacritatis, audaciæ, patientiæ ex Tuâ præsentîâ nostri milites haurirent, quàm certa in Te uno sita esset victoriæ fiducia; sciebamus. Sed dum Tu omnes belli calamitates, omnia omnium Tuorum vulnera sentiebas unus, nos quoque omnes Tua unius pericula horrebamus. Neque nobis quidquam prodesse videbatur ad animi requiem, quòd hostium manus tam procul à nobis arceres: Tibi in itinere, in prælio, in obsidione, in pulvere ac tumultu versanti Gallia omnis aderat, Te subsequens, Te intuens, Tibi adhærens, exanimata, contremiscens, ex Tuâ salute suspensa. Nunc Te jam quieto, quàm placidè conquiescit! Nec solùm ad hanc urbem, quæ nullâ re magis, quàm conspectûs Tui propinquitate ac præcipuo suo erga Te studio supra ceteras Galliæ civitates assurgit, sed ad ultimos Regni fines spirans ex Te incolumitas tranquillitasque pertinebit. Non jam ad hostium irruentium strepitus & minas excitata concurret nostra Britannia; neque ruentem ex Alpibus, hiberni torrentis more, magni vim exercitus subjecta Provincia excipiet; quæ quan-

quam BELLILÆI prudentiâ & virtute depulsoſ populoſ ſuos & præcipiti fugâ exturbatoſ nunquam obliſciſcetur, gaudebit tamen, cuſtode rerum PACISQUE LUDOVICO, ſupereſſe tantum ſecuram tot egregiè geſtorum recordationem, quæ ſub olearum umbrâ cum admiratione enarrentur. Hæc in LUDOVICO ſibi reddito ſatis magna Gallis præſidia ſunt ad ſecuritatem.

Ubertatem verò, quæ & peregriniſ & domeſticis ex copiis effloreſcit, jam ſentimus maximam, majorem proſpicimus. Pacato mari patent portus, qui & commoditate ſuâ, & comitate ac fide Gallorum, & ipſis Galliæ fruſtibus tranſmarinas opes alleſtant & invitant. En agrorum culturæ ceteriſque artibus redditæ tot manus, quas ferri tractandi cupidas bellum occupaverat, ad vitæ ſubſidia & ornamenta convertuntur.

Hæc & alia PACIS bona cogitationum veſtrarum celeritati relinquare me cogit ingens eorum numerus: voſ in LUDOVICI erga voſ amore procreanda, tuenda, amplificanda, deponite. Ex hoc ſacro fonte certa felicitas. Quæ ut propria nobis ac diuturna ſit, quid aliud optandum habemus, niſi ut, ſoſpitem LUDOVICO, cui PACEM florentem gloriâ, commodis uberem debemus, ſoſpitem SERENISSIMO DELPHINO, qui jam adultâ & corroboratâ virtutum indole ſpem nobis affirmat laudum paternarum, Galliam domeſticis gaudiis affluentem nulla Exterorum injuria commoveat: atque ut & LUDOVICI moderatione omniſ Europa, & ejuſdem præſidio fœderatæ Gentem, & noſ paternâ REGIS erga ſuoſ caritate, & ipſe REX admiratione omnium, gratâ voluntate Sociorum, pietate ſuorum, ſuiſ etiam virtutibus ac laudibus diu fruatur.

EXTRACTUM è Commentariis UNIVERSITATIS.

*A*NNO Domini millesimo septingentesimo quadagesimo nono, die vigesima-septima mensis Februarii, hora post meridiem quartâ cum mediâ, Amplissimus D. Rector contulit se cum solito suo Rectorio Comitatu in Majores Sorbonæ Scholas, auditurus V. C. M. Carolum LE BEAU, de PACE nuper promulgatâ, Universitatis nomine & jussu, perorantem.

Postquam dicendi finis ab Oratore factus est, Amplissimus idem D. Rector, statim ab ipso digressu, habuit in Interioribus Sorbonæ Aedibus Comititia Deputatorum ordinariorum Universitatis, scilicet Sapientissimorum Theologia, Jurium & Medicinæ Decanorum, Ornatissimorumque Galliæ, Picardiæ, Normaniæ & Germaniæ Procuratorum, ac dixit, Orationem præfati M. LE BEAU, antequam pronuntiaretur, à se & à nonnullis Viris Academicis, usu & doctrinâ spectatis, visam fuisse & probatam: ipsos modò testes fuisse, dum haberetur, quantâ comprobationis significatione à splendidissimo Audientium Consequu excepta fuerit: rogare se, an Placeat, eam typis mandari. Audito M. LE NEVEU, Syndico, re ad deliberandum propositâ, OMNES CENSUERUNT, præfatam DE PACE Orationem esse quamprimum typis mandandam. Et ita conclusit Amplissimus D. Rector.

HAMELIN, Rector.

N. PIAT, Universitatis Scriba.